

## 25 desambra 2018 - Fankalazana ny Noely



### « Tamin'ny voalohany ny Teny, ary ny Teny dia tao amin'Andriamanitra, ary Andriamanitra ny Teny » (Jo. 1, 1)

Ry Kristianina havana, na dia efa natao tamin'ny fomba manetriketrika ny fiarahabana tamin'ny alina mialoha ny Noely dia ankafaliana, ankaravoana no amerenana ny firariantsoa sy ny

fiarahabana. Tahaka ny fary lava vaniny tokoa ny firariantsoa fa indrindra amin'izao fankalazana manetriketrika ny Noely izao ary hafaliana no hameranana azy amintsika olo araiky. Bonne fête de Noël antsika rehetra, enga anie ho Noely hitondra fiadanana, tanteraka izany fiadanan'ny Noely izany raha

Vakiteny I : Iz. 52, 7-10  
Tononkira : Salamo 97  
Vakiteny II : Heb. 1, 1-6  
Evanjely : Jo. 1, 1-18

manome voninahitra an'Andriamanitra ny fiainantsika manontolo. Araky ny fantantsika ao amin'ny vakiteny faharoa taratsin'I Hebrïo, efa ela tokoa isika olombelona no maniry sy mangetaheta mba hiova ny fiainantsika, samy nahatsapa fa niova izany fiainana izany raha ilay nahary no eo anivon'ny fiainantsika. Fantatr'Andriamanitra izany hetahetam-pontsika izany. Rehefa nanota isika ka nanome lamosina azy tao amin'ny sahan'I Edena dia tsy najanony tamin'ny maha mpanota antsika isika Andriamanitra fa be famindrampo tokoa izy Ray ka naniraka ny Zanany ho tonga nofo sy hitoetra eto amintsika satria fantany fa tsy afaka mamonjy ny tena samirery isika, tsara ho tsapantsika izany ry Kristianina havana. Tsy afaka mamonjy tena isika na inona ataontsika, na manao akory ny fahaizantsika sy angovontsika. Izany hoe hahazo ny tena fiadanana, hahazo ny tena hasambarana.

Ilay hasambarana avy amin'ilay Emanoela Andriamanitra eto amintsika isika irery ihany no hany hasambara marina satria ny famonjena tena izy dia izay mitondra amin'ny hasambarana, mitondra amin'ny fiadanana, tsy vitan'angovontsika sy ny fahaizantsika izany fa Andriamanitra Ray be fitiavana sy be famindram-po no nanolotra ho antsika ny famonjena. Izany no antintranterin'ny taratasin'i Hebrio, na dia teo ireo mpaminany, ireo razantsika, somambisamby izany, tsy nazava fa rehefa naniraka ny zanany Andriamanitra dia I Jesoa ka izy no eto anivontsika dia Izy no manambara izany amintsika.

Ambaran'ny vakiteny voalohany bokin'Izaia mpaminany, hahita ny famonjena ny vazan-tany rehetra. Izany no ankalazaintsika amin'izao Noely izao, fa tanteraka tokoa ny famonjena ao amin'I Jesoa ary ho an'ny olona rehetra, ho an'ny firenen-drehetra ary faly sy ravo mihoby ny famonjena izany isika satria nampihonona ny vahoakany Andriamanitra ary nanavotra an'I Jerosalema, tsy ilay hoe tanana Jerosalema fotsiny izay tananan'ny fiadanana fa izao tontolo izao ary ho zary Jerosalema noho izany famonjena nentin'ny mpamonjy izany. Tananan'ny fiadanana izao rehetra izao satria hatramin'ny faravazantany rehetra no hahita ny famonjen'Andriamanitra.

Araka ny efa naverimberina tamintsika, miankina be dia be amintsika izany famonjena izany, mbola antritanterin'ny evanjely nosoratin'I Md Joany izay mamintina ny tena dikan'izany famonjena izany sy ny fomba handraisana azy. "Namirapiratra tokoa ny fahazavana ary atao hanilo ny olon-drehetra kanefa indrisy nisy olona izay tsy nandray azy, izay tsy mandray dia tsy afaka miombona ao amin'I Jesoa satria nanilikilika an'I Jesoa. Izao tontolo izao no manilikilika an'I Jesoa. Tsy izao tontolo izao no ratsy fa ny miaina araka izao tontolo izao, ny demony tsy mahatanty ny fahazavana nentin'I Kristy. Na dia izy aza nahary an'izao tontolo izao, na dia nisy nanoro lalana tahaka an'I Joany mpanoro lalana nilaza fa izy ilay teny nahariana an'izao rehetra izao, tonga eto anivontsika izy fa isika tsy nahay nandray azy izany hoe tsy mino fa avy amin'I Jesoa ny famonjena fa manaraka ny ratsy dia ny fanapotohana ny tontolom-piainantsika, ny tontolo iainantsika, ny tontolom-pinoana. Ho an'izay nandray azy kosa dia mahazo ny fahazavana ka tonga ho zanak'Andriamanitra ka mahazo fahasoavana miampy fahasoavana ary dia ho feno izany fahasoavana izany.

Raha misy faniriana amin'izao fankalazana Noely izao, ka hitalahoana ny famindrampon'Andriamanitra sady ny fitsilovan'ny Fanahy masina dia ny mba hanokafantsika ny fontsika amin'izao Noely izao ka hitoetra ao amin'Andriamanitra isika. Manome toerana an'Andriamanitra isika raha manao ny marina satria ilay zanak'Andriamanitra eo anivontsika dia Ilay Mrina no anarany. Manaiky azy isika raha miaina am-pitiavana ka ny fahafoizana no mampibaribary an'izany, mahafoy ny fotoana amin'ny fanompoana ny hafa satria noharian'Andriamanitra hitovy endrika aminy ireo manodidina antsika. Ny fahafoizana no mampibaribary ny tena fitiavana.

Matetika isika no manontany ahoana no fivelomana ny finoana ? Ny fahafoizana no endrika hiainantsika ny finoana, reha mahafoy eo anivon'ny fikambanana, eo anivon'ny vaomiera, mandray an-tanana amin'ny lafiny rehetra ary tsy entina hirehareha. Izany no Andriamanitra eo amintsika, amim-panentrentena no hamitana ny adidy rehetra ataontsika. Manambara ny finoana iainantsika ka zary fahazavana isika ary zary Kristy mpiara-belona amin'ny hafa, zary hasina isika eo amin'ny mpiara-belona. Izany no antson'Andriamanitra amintsika ary mifanaraka amin'ny fehinkevitra noraisintsika tamin'ny filankevitra pastoraly izany. Enga anie izao fankalazana ny Noely izao hanome

aina vaovao ho antsika ka hampiroso antsika amin'ny lalindalina kokoa amin'ny maha génération mpanorina antsika. Izany no antondian'I Jesoa eto antany fanorenana vaovao, fahirana vaovoa ka amin'izao Noely izao hanorina ny fiainantsika izy ka ho zava-boahary vaovao ao aminy isika. Izany no hafatra nataon'I Papa tamin'ny tanora ho zavaboahary vaovao isika ao amin'I Jesoa.

Ny dikan'ny Noely dia ho fanorenana miaraka amin'Andriamanitra izay ataontsika rehetra, hanorina Eglizy tranon'Andriamanitra ka ho zary Eglizy Olona Velona tokoa isika ka asehontsika amin'ny fiainantsika andavanandro amin'ny fampitrahaofana ny finoana sy fiainana andavanandro ny maha génération mpanorina antsika.

Ry Jesoa Kristy tompo, mitodika aminao izahay, ianao no fahazavana mitondra hafaliana sy fiadanana ho anay, enga anie ho tahaka anao tokoa izahay hahay hanokatra ny fonay ka hanjaka tokoa ny famindampo sy ny famelan-keloka eran'izao tontolo izao indrindra amin'izao Noely izao, ny fonay anie ho toerana iombonanay bebe kokoa aminao.

Ry Jesoa Tompo ô, aoka ho velona bebe kokoa ny maha zanak'Andriamanitra anay izahay, enga anie izahay hahay hampanjaka ny famindrampo sy ny fifamelan-keloka izay loharano sy fototry ny tena fiadanana sy ny hafaliana ary hitondra anay amin'ny hasambarana. Amen

Mompera Arseveka Mgr Benjamin Ramaroson